



### **BESTE KIENDER!**

Et wodt staorigan weer winter. In de bos van Piepmoes ligt al een best pak sni'j en de moes en zien kammeraoden speulen now haost alle daegen buten. Et is vanzels ok hatstikke mooi, al die sni'j. Ie kun sni'jpoppen maeken, sni'jhutten, gliedebaenen, ie kun mit de slee in de sni'j, en sni'jballen gooien! Luuster mar es wat Piepmoes allegere in et ni'jste verhael beleeft! Mar in de wintertied gebeuren d'r vanzels nog veul meer mooie dingen. Eerst kommen Sunderklaos en Zwatte Piet en een posien daornao is et Kastfeest. Jim zien wel dat dit *Herenhoentien* d'r hiel eers uut zicht as aandere. Et is wit, de kleur van de sni'j. Now is witte sni'j wel hiel mooi, mar zoe'n wit Herenhoentien is aenlik mar hiel saai. Daorum is et de bedoeling dat jim et herenhoentien en de dennetakken en de kastballen zo mooi as jim kunnen, kleuren. Dat gelt vanzels ok veur alle letters en et jaortal 2005. December is omme niet alliend de maond van Sunderklaos en de kastdaegen mar ok van de jaorwisseling, van oold en ni'j. As jim alles mooi kleurd hebben, hoeven jim de viltstiften of de kleurpotloden nog niet op te pakken, want achterop et kraantien staot een spellegien waor aj' die ok veur neudig binnen! In 't *Herenhoentien* zitten twee inlegvellen daor as verschillende kastspullegies en kastversierings op staon die aj' maeken kunnen. Hoe as dat allegere moet, kuj' op de inlegvellen zels vienen. Wi'j weensken jim hiel vule plezier overal mit en tot volgend jaor!

## **PIEPMOES IN DE SNI'J**

*(Een veurleesverhael van Sietske Bloemhoff)*

Et is midden in de winter. In de bos van Piepmoes ligt sund een peer daegen een dik pak sni'j. Piepmoes en zien kammeraoden hebben al een prachtige sni'jpoppe maekt en vandaege willen ze weer in de sni'j speulen. Daor hebben ze groot geliek in, in de sni'j speulen is prachtig, vienen jim ok niet?

Vandaege willen Piepmoes, de doeve en et roodbossien de bos es wat veerder in. De molle en de gelegouw bin d'r niet bi'j. Die vienen et vusen te koold. De molle zit diepe onder de grond lekker in zien mollehusien en de gelegouw vint et in zien warme nussien ok vule noflikier. De gelegouw - dat is de Stellingwarver naeme veur de wielewaal - heurt hier aenlik ok niet thuus in de winter. Alle gelegouwen vliegen in de wintertied naor waarmere streken. Behalve dit maotien van Piepmoes, die is daor in et vere zuden vusen te onwennig van zien kammeraoden. Hi'j blift liever in de bos van Piepmoes.

As Piepmoes en de beide voegels deur de bos sjouwen, bedaenken ze dat ze de kaant van de Lende wel es op gaon kunnen. In die buurt is een heuvel, misschien kun ze daor wel mooi vanof glieden, mient et roodbossien.

As ze vlakbi'j de heuvel binnen, zien ze dat d'r al meer dieren op dat idee kommen binnen. Kiek mar! Diedel en Daweltien, de beide honnen, hebben de hoogste wille! Ze glieden omstebeurten van de heuvel of. De iene keer mit de poten recht veuruut naor beneden, en dan weer achtersteveuren. En daor gaot Diedel, op de rogge en ok nog achtersteveuren, naor beneden en glidt zo een dikke bulte sni'j in. Wat hebben die beide honnen een wille, ze gieren et uut.

'Meugen wi'j ok mitdoen?' raost Piepmoes.

'Vanzels! Kom mar gauw,' blaffen de honnen weeromme.

Mit mekeer bin ze zo een hiele poze an et speulen. Mar op et laest hebben ze de aorigheid d'r of. Ze willen wat aandere.

'As we now es een mooie toren van sni'j maeken bovenop de heuvel,' stelt Piepmoes veur. 'Een soort uitkietoren. Dan kun we hiel veer kieken en alles en iederiene in de gaten holen.' 'Tsja,' mient Diedel, 'en as d'r dan goenend langes kommen, kuwwe die mooi een peer sni'jballen om de oren smieten. Stel je toch es veur dat de beide katten hier toevallig langes kommen.'

'Dat zal wel niet,' daenkt de doeve, 'die beide zullen wel in heur maanties bi'j de verwaarming liggen te soezen. D'r moet hiel wat gebeuren om die winters uut huus te kriegen.'

'Now, veur wat lekkers hebben ze aandere wel wat over,' prakkeseert et roodbossien had-op.

'Daor zeg ie zowat,' keft Diedel inienen. 'Weten jim wat? We lokken ze hier henne, en as ze dan dichte genoeg bi'j binnen, zuwwe die beide katekoppen es op een feestelik maol sni'jballen trakteren! Dat hebben ze wel een keertien verdiend, zo'k zeggen!'

'Mar hoe lokken we heur hier henne?' vragt Daweltien him of.

'Ik weet wel wat,' koerkt de doeve, die ok dudelik nocht an et plannegien krigt. 'Jim moe'n weten, aenlik bin ik niet een gewone doeve, mar een postdove. Dat betekent dat ik post bezorgen kan. En dat betekent vandaege, dat ik de katten post bezorg. Ik bezorg heur een butengewoon aorige brief waarin staot dat d'r onderan de heuvel bi'j de Lende een butengewoon lekker happien op heur ligt te waachten. En as ofzender zetten we op de brief *een kedogien van jim lieve achterneve Pieter van Zaandhuzen.*'

'Hebben ze dan een achterneve in Zaandhuzen?' vragt Daweltien een betien onneuzel. 'Wi'j kommen daor wel es in de buurt, mar die Pieter bin ik nog nooit tegenkommen.'

‘Nee, dat zal ok wel niet, je,’ gniest de doeve. ‘Ze hebben hielemaole gien achterneve in Zaandhuzen, mar as et om wat lekkers gaot, trappen die beide doerakken daor wel in.’

En zo gebeurt et dat even laeter de doeve mit een grote brief in de snaevel de kaant van de boerderi’je op vligt. Intied bin de ere dieren drok an et bouwen mit de toren van sni’j. En as ze die klaor hebben, beginnen ze mit et maeken van sni’jballen. As de doeve d’r weer an komt, hebben ze al een hiele bulte klaorliggen.

‘Klaos en Miep kun mar kommen, doeve,’ schaetert Piepmoes bi’j veurbaot.

En dat doen de beide katten ok. As ze zien dat d’r een brief veur heur is, lezen ze die mitien. ‘Van oonze achterneve Pieter uut Zaandhuzen,’ mauwkt Klaos. ‘Die kan ik me zo iens niet veur de geest haelen, ieje wel Miep?’

Nee, Miep wet ok niet krek wie as achterneve Pieter van Zaandhuzen is. ‘Mar hi’j wil oons zeker graeg weer een keertien zien,’ miemert Miep, ‘en oons, om opni’j in de kunde te kommen op wat lekkers trakteren. Et is in elk geval een slim lieve achterneve, daor het hi’j geliek in. Kom Klaos, we gaon die kaante op, we moe’n et lekk..., ik bedoel Pieter, niet waachten laoten, dat zol sneu wezen!’

Even laeter zien de dieren in de uitkiektoren de beide katten d’r ankommen. Ze wrieven heur in de poties van plezier, et feest kan zowat beginnen. Ze pakken allegere een dikke sni’jballen en waachten tot de katten dichte genoeg in de buurt binnen.

Klaos en Miep kieken now alle kaanten op as ze Pieter en zien lekkers ok zien.

‘Ik zie oonze achterneve nargens,’ bromt Klaos tegen Miep. ‘Ston d’r niet in de brief waor as Pieter precies wezen zol? Hej’ de brief aenlik wel goed lezen?’

‘Wel allemachtig,’ foetert Miep. ‘Daor hej’ him weer. Tuurlik heb ik die brief goed lezen, ik heb jow die ommes nog hielemaole veurlezen. Hej’ soms niet goed luusterd?’

‘Jaowel heur,’ bromt Klaos weer. ‘Mar snap ie dan waor die neve mit zien lekkers is?’

Binnen een menuut snapt Klaos dat wel, en Miep trouwens ok. Want dan soezen heur de sni’jballen om de oren. En niet allieend d’r omme, mar d’r ok op. En op de neuze, en de kop, en de rogge, en alderdeegst de punties van de beide kattestatten ontkommen niet an de sni’jballen.

‘Klaos, Klaos,’ mierkt Miep, ‘wat gebeurt d’r, wat is d’r an de haand? Wie dot dat toch, zoks dot oonze lieve achterneve Pieter van Zaandhuzen toch niet?’

‘Nee,’ heuren de katten dan brullen. ‘Dit bin koolde lekkerni’jen van Pieter van Sni’jhuzen. Wollen jim nog meer? Kan wel, heur! Kom op, doe mit, en gooi ok es een peer sni’jballen, of durven jim niet?’ En mit vligt d’r weer een ni’je perti’j sni’jballen deur de locht.

‘Hool op, hool op,’ jammert Klaos. ‘Ik vien niks an dit spellegien en ik krieg et koold. En ik hadde krek zoe’n zin an dat lekkers van achterne... Wie bin jim aenlik??’ bedaenkt hi’j dan.

‘Ha, ha,’ heuren de katten. ‘Wie wi’j binnen? Wi’j bin de verschrikkelike sni’jhonnen en sni’j-doeven en sni’jgelegouwen en sni’jmoezen van Sni’jhuzen.’

‘Verhip, Klaos,’ jankt Miep en veegt him de sni’j van de huid. ‘Et bin Diedel en Daweltien en zo. En Piepmoes is d’r ok bi’j, die bekoegelt oons ok, hi’j was et lekkers van oonze zogenaemde lieve achterneve Pieter. Wi’j hebben vanzels hielemaole gien achterneve in Zaandhuzen. Ze holen oons mit mekere veur et lappien. Oei, oei, a’k ze in de klau...’

Miep kan zien zin niet ofmaeken, want intied belaant een joekel van een sni’jballen percies op zien kattesnute. Miep springt wel een meter in de locht van schrik, dri’jt him omme en goest vot. Klaos is d’r niet vule beter an toe en vligt achter Miep an. En de katten fóeteren, en schéllen, en ráchen, zó arg dat jim dat beter mar niet heuren kunnen!

De dieren bi’j de uitkiektoren hebben vanzels de grootste wille en lachen heur slop.

‘Wat een topdag,’ geniet Piepmoes nog wat nao, ‘mar wat zuwwe morgen es doen gaon...?’

## PIEPMOESKASTSPELLEGIEN

Op disse bladziende hebben we dit keer een mooi kastspellegien.

Ie kun et mit twee of meer kiender speulen.


Veur et spellegien hej' twee dobbelstienen neudig en veur elke speulder een tekening van Piepmoes zoas die op disse bladziende staot. Veerder moej' elf verschillende kleurpotloden of viltstiften brucken. Die kleurpotloden of viltstiften moe'n de volgende kleuren hebben: gries, rood, donkerrood, lochtiggruun, donkergruun, lochtigblauw, donkerblauw, geel, paors, oranje en zwat.

### Et spellegien gaot zo:

Gooi ombeurten mit de dobbelstienen. Tel de punten die naor boven liggen bi'j mekere op. Hej' bi'jveurbeeld een 2 en een 3 gooid, dan wodt dat 5. Bi'j et riegeltien ciefers dat hieronder staot, staot achter elk ciefer een kleur. Bi'j 5 is dat donkerblauw. In de kleurplaete staon ok allegere ciefers. De dielen van de kleurplaete daor een 5 in staot moe'n donkerblauw kleurd wodden. Mar ie meugen per keer mar ien zoe'n vakkien inkleuren! Sommige ciefers staon mar ien keer in de tekening, eren vaeker.

Aj' je vakkien inkleurd hebben, mag de volgende speulder. Hej' alle vakkies van een bepaold ciefer klaor en ie gooien toch weer dat getal, dan hej' pech en moej' waachten totdaj' weer an de beurt binnen. Wie as eerste alle vakkies inkleurd het, is de winner. Veul plezier!

2. gries - oren en stat
3. rood - jasse
4. lochtiggruun - kastboom
5. donkerblauw - raemen
6. donkergruun - sokken en haanske
7. geel - mure
8. paors - broek
9. oranje - kastboomballen
10. donkerrood - musse
11. lochtigblauw - kezien
12. zwat - riem van de jasse



## Piepmoes in de kastboom

Op dit inlegvel zien jim  
Piepmoes mit een kastboom.  
Mar jim zien de moes niet  
ien keer, mar twie keer!  
Et doel daarvan is dat jim  
van de beide prenties iene  
kastversiering veur in je  
eigen kastboom, of die  
van schoele, maeken!  
As jim de beide prenties  
uutknippen passen ze percies  
op mekeer. Zo wodt de  
versiering an beide kaanten  
even mooi. Aj' deur de zwatte  
stippel in et iene oor van  
Piepmoes een gattien prikken  
kuj' daor een touwgien deur  
doen om Piepmoes zo mit  
zien kastboom in je eigen  
kastboom (of die van schoele)  
te hangen. Mar ie kun vanzels  
ok een touwgien tussen de  
beide prenties doen aj' die op  
mekeer plakken.  
Mar veurdat et an et plakken  
toe is, moej' vanzels eerst de  
beide prenties zo mooi meugelik  
kleuren!



## Kastslingers

Jim zien hier drie  
verschillende feuren:  
Piepmoes, een kastboom  
en een steertien. Ze bin  
allegere twee keer ofdrokt.  
Van de feguurties kuj'  
mit mekeer een mooie  
kastslinger maeken. Die  
slinger kuj' in de kastboom  
hangen, mar vanzels  
ok wel op een eer  
plakkien. En jim  
zollen ok mit mekere  
een hiele lange slinger  
maeken kunnen die  
jim dan argens in  
schoele ophangen.  
Behalven de feguurties  
van dit inlegvel hej'  
ok nog een lange  
draod neudig. Et  
mooiste is vanzels  
een zilver- of goold-  
kleurige draod, of een  
mooi kastlint.  
An de boverkaante  
van de feguurties zit  
een wat langere reep.  
Aj' die insmeren mit wat  
liem, kuj' je feguurtien zo  
over de draod of et lint  
vouwen en vaasteplakken.  
Mar eerst moej' de feguurties  
vanzels hiel mooi kleuren!  
Aj' te min feguurties hebben,  
kuj' juf of meester even vraogen  
as ze een peer ekstra kopiëren.

